

Wallensköld

I.

Du tres douz non a la Virge Marie
vous espondrai cinq letres plainement.
la premiere est m, qui senefie
que les ames en sont fors de torment;
car par li vint ça jus entre sa gent
et nos geta de la noire prison
Deus, qui pour nos en sousfri passion.
Iceste m est et sa mere et s'amie.

II.

A vient après. droiz est que je vous die
qu'en l'abecé est tout premierement;
et tout premiers, qui n'est plains de folie,
doit on dire le salu doucement
a la Dame qui en son biau cors gent
porta le Roi qui merci atendon.
Premiers fu a et premiers devint hom
que nostre loi fust fete n'establie.

III.

Puis vient r, ce n'est pas controuvaille,
qu'erre savons que mult fet a prisier,
et sel voions chascun jor tout sanz faille,
quant li prestres le tient en son moustier;
c'est li cors Dieu, qui touz nos doit jugier,
que la Dame dedenz son cors porta.
Or li prions, quant la mort nous vendra,
que sa pitiez plus que droiz nous i vaille.

IV.

I est touz droiz, genz et de bele taille.
Tels fu li cors, ou il n'ot qu'enseignier,
de la Dame qui pour nos se travaille,
biaus, droiz et genz sanz teche et sanz pechier.
Pour son douz cuer et pour Enfer bruisier
vint Deus en li, quant ele l'enfanta.
Biaus fu et genz, et biau s'en delivra;
bien fist senblant Deus que de nos li chaille.

V.

A est de plaint: bien savez sanz dotance,
quant on dit a, qu'on se plaint durement;
et nous devons plaindre sanz demorance
a la Dame qui ne va el querant
que pechierres viengne a amendement.
Tant a douz cuer, gentil et esmeré,
qui l'apele de cuer sanz fausseté,
ja ne faudra a avoir repentance.

VI.

Or li prions merci pour sa bonté
au douz salu qui se commence ave
Maria! Deus nous gart de mescheance!

- letto 696 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/wallensk%C3%B6ld-33>